

鄒魯·鍾榮光·胡元倅

周邦道

當代教育先進傳之十八

鄒魯 (1884-1954)

鄒魯，字海濱，號澄廬，廣東大埔人。先世居閩長汀，宋末，有祖應龍，舉族擁宋宗室南徙，遂為粵人。生於清光緒十年甲申一月六日，卒於民國四十三年二月十三日，年七十。自幼入塾，思想雋異，出語驚人。年十九，負笈潮州韓山書院，值興學堂，縣令類塞責，具虛名，乃與同里張燿，以鷹洋四番，自籌辦學，人以爲妄。得塾師張竹士助，卒底於成，曰樂群中學堂，此爲獻身教育之始。後至省會，肄業廣東政法學堂，見同鄉子弟來穗求學者多向隅，即以親友夔贈金百二十圓，創潮嘉師範學堂以納之；自是聲譽鵲起。甲午中日役後，矢志革命，由吉隆坡楊穆如，介入尤烈所組中和堂；中和堂者，興中會南洋支會也。乙巳，註籍同盟會。宣統二年庚戌，爲響應倪映典新軍起義，甫集民軍於汕頭而敗訊至，即潛回。得師丘逢甲庇，任廣東諮議局書記，並主講兩廣高等方言學堂。尋創「可報」，宣傳

革命。廣東既光復，組北伐軍，自任兵站總監，大破張勳於固鎮，清帝遂宣布退位。

民國元年，南旋，任官錢局總辦。二年，當選國會議員，袁世凱以重金賄組新黨，峻拒，而疊提案彈劾。二次革命失敗，東渡，入早稻田大學研究，佐組中華革命黨，與胡漢民、居正、朱執信、戴傳賢等，共主民國雜誌筆政。護國、護法及討伐陳炯明諸役，策動軍事，多所致力。國民黨改組，任第一屆中央執行委員會常務委員兼青年部部长。

十二年十一月，國父令改廣東高等師範爲國立高等師範學校，以魯爲校長。翌年二月，又令將高師、暨廣東法科大學、廣東農業專門學校，併改爲國立廣東大學，魯仍任校長。國父當時手創是校及黃埔軍官學校，一經文事，一整武備，旨在爲革命建國事業肇造丕基也！後以里昂中法大學，爲廣大海外部之一，復將廣東公立醫科大學併入，規模益大。大學綜分文、理、法、農、醫五科，預科分文、理、法、農、醫五組，

另設初級師範、中學、小學；各科置學長，預科及附校置主任。魯經營部署，並遵令擬訂大學規程，特別會計規程暨各科組課程焉。

國父自十三年二月起，每週親至廣大禮堂，宣講三民主義，紀錄稿均交魯校讀。魯謹慎將事，琢磨推敲，必至文理無瑕，始簽請爲定本。第一二兩次經國父修正稿，藏廬所，爲日機炸毀，良可惜也！魯常巡視教室，故生無廢讀，師無怠教。而於安南、臺灣、朝鮮及苗黎子弟，尤廣招致，資以膏火，柔遠作人，於以知其襟期矣！國父北上罹疾，魯隨侍左右，並簽證遺囑。鮑羅廷率領異黨，陰謀篡奪，實張跋扈，魯憤激與忠貞同志，集會西山碧雲寺。國父靈前，決議清共，卽世所稱「西山會議」也。

魯在京滬，中央派陳公博、褚民誼相繼代理校長。十五年七月，爲紀念國父，改名國立中山大學。於經亨頤、戴傳賢、朱家驊、許崇清諸校長後，魯於二十一年二月，至二十九年六月，復任校長。廣東公立工業專門學校、國立廣東法

科學院、省立勤勤大學工學院，亦先後併入。全校共設文、理、法、農、醫、工六學院，另設研究院，分文科、農科、教育三研究所，後又增鄉村服務實驗區及師範學院。為擴充計，於石牌創設新校舍，以六年為期；而將高初中遷文明路大學舊址，稱附屬中學。此外，設新制小學實驗班，一年四學期，四年畢業。規模之大，蓋又遠邁廣太時期矣。

二十五年，出席柏林世界大學教育會議，海德堡大學贈以法學博士，日寇南侵，學校遷滇南激江，魯計畫籌措，煞費精神。二十九年，以病滯渝。許崇清、張雲、金曾澄先後代理校長，逐步遷粵北、湖南；直至三十四年底，始由王星拱校長，復員穗垣。魯於中大，創始擴充，荷負重責，固無時不殷殷在抱也。

魯歷任中央各屆執行委員、國防最高委員會常務委員、國民政府委員、總統府資政、監察院監察委員。而性素剛方恬退，視名位泊如也。暇於教育哲學基礎，主以仁愛互助，代替殘酷鬥爭，屢見講詞及論文中。著作等身，已行世者，為：中國國民黨史稿、三月二十九日革命史、中國國民黨史略、中國國民黨概史、紅花岡四烈士傳記、日本對華經濟侵略史、二十九國遊記、太原約法草案說明、我對於教育之今昔意見、抗戰和平之我見、回顧錄、澄廬詩、文集。殉之日，子女均在海外，夫人立法委員趙淑嘉，經紀其喪，葬臺北市大直公墓。總統以魯戮力黨政，盡瘁教育，曾明令褒揚，以彰勳蓋云。

（本鄉海濱先生治喪會所印事略，張鏡影：鄉海濱先生傳，鍾實助：中山大學母校沿革史稿，「國父全集與母校文獻」。）

鍾榮光 (1868-1942)

鍾榮光，號惺可，廣東中山人。清同治七年戊辰生。父蓮舫，棄儒經商。母何氏，香山望族，深通經史。蓮舫四十後，始生榮光。生荏弱，而慧點多辯，因強之讀，嚴督課。光緒八年壬午，舉茂才，己丑中副榜，甲午登科。少年落拓不羈，惟富於血性，故能猛悟自勵。

甲午之役，敗於日本，榮光奮然投袂起，隱立革命大志。因左斗山、歐鳳墀二人之介，得締交孫先生及陸皓東等志士，遂加入興中會。歐與楊襄甫，為生平摯友，而孫、歐、楊、左，俱為基督教徒。感於基督教之潛力，暇輒研究聖經，入基督教會。更以廖德山之介，識廣州格致書院院長尹士嘉。尹為西籍牧師，廉正有禮，素重榮光，使入院相助。院即嶺南大學前身，是為榮光戮力嶺南之發軔。

庚子，格致書院生史堅如志士死難。榮光在鼓吹革命之報館被圍，事急，登屋脊得脫。走澳門，書院隨遷，榮光即主其事，易院名為嶺南學堂。時學生僅數十人，自任漢文總教習。同時又攻習西文及各科，就學於諸師，若衆生然，其虛心嚮學如此。爾後，校址遷還廣州，購地建築臨時校舍，學生日衆，奔走籌款，先至香港、澳門，後赴南洋、英、荷、庚戌、辛亥間，叩命環歷世界，先至美國募建校舍禮堂。民國肇建，榮光

適返國，孫先生親至嶺南，請出長廣東省教育司。迨袁世凱叛國，為省長龍濟光所逼，乃走美洲。次年，世界大戰起，與留美華僑合組共進會，籌款以濟嶺南學堂。同時，即於哥倫比亞大學研究院攻教育行政。袁氏既殞，挈眷返國。時朱慶瀾主粵，於校事多所協助，歷六七年，校舍乃林立美備。

美國教友創辦嶺南，初僅設文理兩科，生數不過五六百人，如斯丹福大學重質而不重量。榮光則洞悉國人所需，極意恢拓。民國九年，成立農學院，政府資助開辦費三十萬元，常年經費十萬元，校地擴充至四千餘畝，後以次增設商工醫學各院，又設設神學院。向主各科均衡發展，而尤重農科實驗，中山、粵北，各有實驗場所。籌路藍縷，以啓山林，規模既大，費用難繼，十二年再赴南北美洲勸募鉅款。以一人之力不足，越年，且電召其夫人鍾芬庭馳助。十五年，榮光年已六十矣，猶奔走海外，而國家多故，校內亦起內訌。不得已，馳歸，並力主教會大學主權應歸華人。十六年，嶺南大學卒移華人接辦，群推為校長。教會校政由華人主持，榮光實為第一人。二十二年又改原博濟醫院為逸仙醫院，蓋紀念孫先生昔嘗習醫於此也。二十七年，以老辭，校董事會議，尊為榮譽校長，卜居越南海防。時政府已西遷重慶，學校亦遷香港。榮光膺國民參政會參政員，奔走國事，往來渝港，不辭勞悴。太平洋戰起，香港旋陷。三十一年一月，竟憂憤卒，年七十有五。

榮光貌清癯，而精力過人。毅以任事，誠以

待人，視學生如子女，門人莫不愛而敬之。於廣東省教育司外，曾主持教育會，任國民政府教育行政委員會委員，及華僑教育委員會委員，曾一度任僑務局局長。平生篤實踐履，不尚浮名。年屆稀齡嘗自輓一聯云：「三十年科舉沈迷，自從知過悔改以來，革過命，無黨勳；作過官，無政績，留過學，無文憑；才力總後人，一生事工，盡瘁嶺南至死。」兩半球舟車習慣，但以任務完成為樂，不私財，有日用；不養子，有徒衆；不求名，有記述；靈魂乃真我，幾多磨練，榮歸基督永生。」此殆其畢生事業之寫照矣。

（本郭琳爽：教育界巨人鍾校長榮光博士記略。）

胡元倓 (1872-1940)

胡元倓，字子靖，號耐齋，晚年自署樂誠老人。湖南湘潭人。祖筠帆，清同治中知廣東南海縣事。考同生，世父前門，幼侍父宦遊百粵，從東塾陳澧遊，俱有著述行世。元倓生於同治十一年壬申八月初七日。趨庭之餘，耳濡目染，頗以著書淑世為志。始治姚江學，以孝誠為立身治學之本。蚤歲入邑庠，為名諸生。尋選光緒二十三年丁酉科拔貢。鑒于甲午庚子國耻之深，轉思日本明治勃興之故，因棄舉業。於二十八年奉湘撫俞廉三之命，赴日本，依范源濂安排，學於弘文學院速成師範科。始了然于日本維新之功，實肇端教育，遂矢志以教育救國培養人才為己任。

翌年返國，得攸縣龍璋與其叔龍侍郎霖瀝之助，創立明德中學於長沙，賃租左文襄祠為校舍


，延攬黃廬午、張繼、周震麟、吳祿貞、王正廷、蘇玄瑛、劉佐揖、陸鴻逵、李步青等，分任國文、理化、史地、兵操諸課，自任監督。草創之秋，校款奇絀。元倓北走燕、遼，南下金陵，為將伯呼。以得端制軍方、嚴侍郎修、熊總按希齡、譚督軍延闈資助，得免中廢。惟以風氣初開，師資缺乏，而來學者，程度又復參差。乃於中學之外，添辦師範理化諸選科，及高等小學。元倓僕僕南北，遠及日本，籌經費，求名師，固未嘗暖席。丙午臘月之詣端督也，湖南方有瀏、醴之役，蜚語竟及元倓。端為其熱忱所感，置弗問。丁未夏，歸自日本，各校款益艱困；得請於端督，由裕定錢局借二萬金，赴滬取兌，而總辦孫某竟靳不予。元倓大恚，欲死。黃澤生、譚延闈方主校事，慮不測，馳電慰之。又得校中同人自動捐薪，困乃少蘇。其詣熊總理也，三謁未得見，乃橫被閤室以待之。其醉心作育，之死靡它，不惜犯霜雪，歷艱辛而赴之，類如此。

中小學基阨既固，謀擴展為大學。民國二年，遂由黃廬午與領銜，呈請設明德大學於北京，先後聘章士釗、李儻為校長。五年三月，以袁氏謀叛，且亟示與絕，自行停辦。八年，重設於漢口，款仍無出。於是親赴南洋一帶，為籌募計，足跡歷星洲、仰光、曼谷諸地，漢校賴以不墜。閱七年，復因經費不繼中輟，嗣遂轉力於中學。此際，明德成績已卓著，政府時亦周濟之。校務雖日進有功，願元倓自視，則仍欽然也。

元倓生平於死友中最不忘者二人，一曰黃廬午，一曰譚延闈。嘗語黃曰：「養成中等社會，

實為立國之本圖；惟其事繼而難為，公倡革命，乃流血之舉；我為此事，則磨血之人也。」延闈卒前，屢貽書元倓，推勉備至。一則曰：「近益感於國人之無教育，仍不能不望之我明德。」再則曰：「我輩惟公有職業，不可不勉。」三則曰：「死不難，不死難。」壬申癸酉之間，國步迍邴，於茲為極。元倓蒿目心驚，既念死友之言，益堅後死之節。時存「身為學殉」之決心。名位之榮，視之蓋蔑如也。抗戰軍興，遷校於湘鄉霞嶺曾氏宗祠。中央召為國民參政員，因駐重慶。二十九年庚辰十一月二十四日卒，年六十有九。著有耐齋言志，修身約言二書。約言係哀集陽明傳習錄及明儒學案粹語而成者，尤足詔示後學云。

（本陳志濤：胡子靖先生家傳，吳相湘：「磨血老人胡子靖」，黃中：「胡元倓」。）



國立中山大學首任校長鄒魯先生遺照